



المجلس القومي للمرأة
THE NATIONAL COUNCIL FOR WOMEN

تربية الأطفال مسئولية مشتركة

مستخلص من مبادرة معاً لنبقي
البرنامج التوعوي للمقبلين علي الزواج
والمتزوجين حديثاً



#سر_قوتك

لنبتقى
معاً



اتكلشي
احمى نفسك .. وغيرك
لا للجرائم الالكترونية

اتصل على

15115

للحصول على الدعم القانوني النفسي الاجتماعي

مكتب شكاوى المرأة
احنا معاكي

عام ٢٠١٦ كان بداية فكرة اتولدت جوا لجنة الشباب بالمجلس القومي للمرأة، فكرة إطلاق مبادرة وطنية للمقبلين على الزواج والمتزوجين حديثا، هدفها حماية الأسر من التفكك والحد من ظاهرة الطلاق التي بدأت تنتشر في السنوات الأخيرة. وخلال احتفالية المرأة المصرية في مارس ٢٠١٧ أعلن السيد رئيس الجمهورية عام ٢٠١٧ عاما للمرأة المصرية وكمان ناشد الحكومة إنها تتبني مبادرات لدعم الأسرة المصرية . وحماية كيانها .. لأن الاسرة هي نواة المجتمع اللي لو صلحت وتماسكت يبقى احنا أكيد هنكون في مجتمع سليم وسوي وفي عام المرأة بدأ تنفيذ برنامج **معا لنبقى** وكان هدفه الأساسي تعميم السلام المجتمعي من خلال إننا نتعلم إزاي نتقبل الاخر مهما كان مختلف عننا لإن الاختلاف بالاساس هو رحمة، وإزاي نستفيد من اختلافنا ونخليه حاجه إيجابية ونلحقه قبل ما يتحول من اختلاف لخلاف، واننا نتعرف على نفسنا ونفكر إزاي نحاسب نفسنا قبل ما نحاسب الاخر، نتعلم إيه هي حقوقنا وإزاي نطالب بيها بلطف وحيادية وواقعية ، وإيه هي التزاماتنا وإزاي نأديها ومنقصرش فيها، والمبادرة اتعلمنا فيها برضو يعني إيه حب وإيه هي أنواعه وإزاي تحب شريكك وتوصل له الحب دا بالطريقة اللي تسعده مش بطريقتك إنت، اتعلمنا إن أولادنا أمانة في إدينا وإن الخلفة مسئولية مشتركة وتربية الأطفال محتاجه مذاكرة واتعرضنا كمان في المبادرة للمشاكل اللي ممكن تحوم حوالينا وحوالين ولادنا منها التنمر والتحرش والعنف الأسري اللي بنمارسه على بعض من غير ما ناخذ بالنا منه ولا من نتايجه.

البيت هو المكان اللي ولادنا بتكبر فيه وبتكبر معاهم احلامهم وطموحاتهم. لو البيت ده بيحسوا فيه بالامان هيطلعوا اسوياء واقوياء اما لو بيحسوا فيه بالضغط والمسئولية بدري بدري هيطلعوا هاشين. عشان نعدى من مرحلة عمرية للمرحلة اللي بعدها لازم تكون الظروف مهياه لينا وبتساعدنا على كده. الطفولة مش المرحلة العمرية الخاصة بتحمل وكبت المشاعر، الطفولة هي الوقت اللي لازم اولادنا فيها يحسوا بالامان، التوجيه، الحب والاستقرار. العنف اللي اطفالنا بيشفوه في البيوت بيخليهم يتخطوا طفولتهم ويعدوا مرحلة عمرية مهمه قوي لتكوين شخصيتهم. بيخليهم عايزين يتحملوا المسئولية من بدري ويتقمصوا دور مش دورهم ومهام مش مهامهم وده طبعاً بيحصل من غير مايحسوا ولا احنا .



حافظ عليه ميكونش (هش)

ورزع الباب ومشى...

ووقفت البنت الي عندها عشر سنين فى صراع شديد بين انها تساند أمها المنهمرة فى البكاء ولا تساعد اخوها اللي كان مخضوض ومنهار وبيترعش من صوت الاب الجهورى المرعب والمُخيف الصوت هز البيت ومن ضربه لمامتهم .. الضرب اللي خلي البيت شكله وحش اوى... كان قدام البنت الصغيرة حل من اتنين.. أما ان تنفجر زي امها واخوها .. أو تمسك نفسها وتكتم دموعها وتموت جواها مشاعر الخوف والرهبه والتوهان والوحده والألم الي كانوا ماليين احاسيسها .. وتجرى تحضن امها وتحسسها انها حاسه بيها وتحسس امها بالامان اللي هي محتاجاه فى اللحظة دي و تعتذر لها عن اللي حصل لها من ابوها .. وكمان تجيب لعبه لأخوها الي عنده سبع سنين وتحاول تضحكه وتشغل له كرتون علشان تطمنه وتخرجه من خوفه.."





وهنا في سؤال مهم أوي لأزم نسأله:
مين هو المسؤول في الأسرة دي ؟ مين هو رب الاسره وسندها؟
مين اللي المفروض يحقق أمان البيت ؟ حتي الامان النفسي
مين المسئول انه يحافظ علي استقرار البيت العاطفي؟

بجد مأساه .. الادوار اتبدلت .. لان الي حصل ان البنت هي الي اتحملت المسؤولية عن الاستقرار النفسي للبيت .. هي الي حاولت تلملم ورا ابوها .. هي الي حاولت تضبط الحالة النفسية لاخوها و امها .. هل دا كان دورها؟؟ مش دورها ..

عارفين ليه؟؟
لان في اللحظة اللي هي قررت فيها تقوم بالدور دا هي فقدت حق من حقوق طفولتها .. فقدت الفرصة في التعبير عن المها .. والتعبير عن مشاعرها في الموقف دا ومخدتش الفرصه أنها تبكي زي اي طفل .. تخاف، تلاقي حد يطبب عليها، تتحضن، يتم أحتواها بسبب كل الي أتعرضت له في الموقف ده. مش بس كدا



دا كمان هي اللي لملت؟؟
تفتكروا لو دا بيتكرر كل يوم هل البنت دي هتطلع سوية نفسيا



البنت في السن دا هي في سن المراهقة .. عندها صراعاتها الداخلية الخاصة بيها .. عندها احتياجات كتير وتساؤلات أكثر جواها بحكم المرحلة العمرية الي هي فيها .. هي لو حدها وبدون أي مشاكل حوالها بتكون مشنته وده طبيعي ..



ولما حصل الموقف دا ادامها هي فقدت الفرصة كمرافقة عندها صراعتها الطبيعية .. فقدت انها تلاقي حد يلبي احتياجاتها الطبيعية لبنت في سنها .. في السن دا طبيعي هي محتاجة الي أب وأم يساندوها ويعدوا بيها ومعها بأمان من مرحلة تعتبر من اهم و اخطر مراحل حياتها .. الحقيقي ان المفروض يكونوا هما سندها .. تتمتع بيهم وبحبهم .. وتستمتع بحنانهم وأرائهم .. مساعدتهم ليها في حل مشاكلها وصراعاتها الداخلية .. مش هما اللي يبقوا حمل عليها..!

وده اللي ممكن يخلي ابني او بنتي هتش .. بدل ما حبنا واحتواءنا ليهم يحميهم انه يكون هتش. البيت مبقاش ملجأ لكنه اصبح "حلبة صراع" .. مكان بيحصل فيه مصارعه بدل ما يكون مكان تلجأ اليه لما يحصل جواها صراعاتها.. تستخبي فيه وتطمئن .. تلاقي فيه النصيحة والارشاد .. اولادنا بيلجأوا اليه لما يحصل ليهم و جواهم صراعات بقي مكان بيضيع فيه حق أولادنا في اننا نساعدهم في حل صراعاتهم بوجودنا جنبهم

احنا مش مدركين حجم الي بيتعرضوا اليه الأطفال بسبب خناقتنا . قد ايه دا صعب ومؤلم .. واد ايه بيضيع عليهم فرص هم محتاجينها لانه بينشغلوا معانا في حاجاتنا و احتياجاتنا احنا .. وياريتها حاجات حلوة .. دي حاجات بتخليهم هتش



من الاخطاء الشائعة جدا جوا بيوتنا في تربية ولادنا

صدمة المسؤولية المبكرة الي يتحملوها الاطفال لما يكونوا هما المسؤولين عننا مش العكس:

ودا بنعمله لما نتخانق ادامهم ويضطر الطفل يعمل نفسه مش واخد باله .. او يضطر هو الي يطبب ويحضن الام مثلا .. او يضطر يكتم دموعه ويستحي تحت السرير او ورا الدولاب .. كمان بتحصل كتير اوي اننا متخانقش ادامهم ونتخانق من وراهم بس ندخلهم في مشاكلنا .. زي مثلا اقول لبنتي .. ماما راحت عند تيته ولا لأ .. ولو مقولتيش انا همنع عنك المصروف .. او مثلا الام تبعت للاب الرسائل عن طريق بنتها لانها مش طايقة تتكلم معاه وتبقي البنت هي الوسيط وهي علي فكرة بتكون فاهمه كل حاجه واحنا متخيلين انها مش فاهمة .. وحتى لو مش فاهمه هي حاسة بالجو العام .. اطفالنا اذكيا جدا.

تحميلهم مسؤولية اخواتهم بشكل مبالغ فيه من سن بدري:

ودا كتير مننا بيعمله .. خاصة لما يكون الطفل الاكبر ولد .. نقوله دايمنا .. عينك علي اختك .. خلي بالك منها .. اوعي حد يضايقها دا كمان لو الاخ الاصغر وقع ولا حصل له أي حاجة .. نقعد نقول للكبير .. هو انت كنت فين .. ازاي حد يضربه انت موجود .. دا كمان في امهات بتضرب الكبير لما الصغير يحصل له حاجه .. اقولكم علي الاصعب .. ساعات الام تحاسب الابن الاكبر عن الدوشة اللي عاملها الابن الاصغر .. وبيوصل لدرجة ان احيانا الصغير لما يبصرخ علي لعبة بتاعة الكبير .. بنجبر الكبير انه يسبب لعبته للصغير .. بأمانة بقي .. انت لما بتعمل كذا بتعمل كذا ليه؟؟ يعني لما بتجبر الكبير علي سبيل المثال يسبب لعبته للصغير بيكون هدفك ايه .. جاوب علي السؤال دا بأمانة .. بتريح دماغك من الزن ولا فاكرك انك بتعلمه المسؤولية والاحتواء؟؟



بوجه عام نقصد هنا تحملهم المسؤولية بشكل مبالغ هو اللي غلط .. مثل مبدا تحميلهم المسؤولية .. لان درس المسؤولية مهم يتعلموه .. المهم امتي وازاي و في أي سياق ولأى مدى وكمان لازم نعرف لما يقصر في مسؤوليته نتعامل معاه ازاي.



حرمان ولادنا من حقهم في التعبير:

ودا بيحصل لما ميكونش عندهم مساحة من التعبير عن الي بيحسوا بيه .. سواء بسبب اننا مثل فاضيين نسمعهم ومشغولين مع ضغوط الحياة .. هنا السؤال لو ضغوط الحياة علشان الفلوس .. احنا بنجيب الفلوس ليه؟؟ الفلوس ولا الولاد؟؟ كثير اوي بنكون عاملين زي عسكري المرور الي واخذ تعليمات وبينفذها وخلص وناسي الهدف من وجوده اصلا يكون ملتزم بتوقيف الطريق كل خمس دقائق .. فيحصل تكدر مروري مثلا في حارة معينة وهنتج عنها ازمة كبيرة لو مكانش مرن وقدر ياخذ قرار حكيم وفقا للي شايفه بعينه .. لكن الي بيحصل انه يفضل ملتزم باللي حافظه في دماغه مع انه لو افكر الهدف من وجوده الي هو تسهيل حركة السير ومنع حدوث تكدسات .. اكيد هيقرر وفقا للواقع الي شايفه ادامة .. دا الي احنا بنعمله .. احنا بنشتغل علشان نأمن ولادنا ونلبي احتياجاتهم .. لكن ساعات بننسي ان الشغل هو الوسيلة والاولاد هم الغاية .. فبنيجي عليهم علشان الشغل كمان احيانا بنحرمهم من التعبير عن رأيهم لمجرد اننا مصدعين .. مش قادرين .. نبرغي مع خالتو او مع عمتو .. بس الاثر النفسي لتجاهلنا لمشاعرهم هيكون اكثر خطورة من ضرر صداعنا او زعل خالتو .. كمان بنحرمهم من تعبيرهم عن رأيهم لو سمعنا جزء منه وحسيناه تافه او انه عكس رأينا .. هو انا لسه بقي هقعد اقنع في العيل الصغير دا؟؟ هو انا فاضي؟؟ هو دا الي انت هتعمله و متجادلنيش .. دا اكبر غلط .. سيبه يتكلم ويعبر ويصدعك .. هيعبر لمين .. طب هينصحه بأيه .. الي انت بالنسبة لك شئ تافه .. بيكون عنده شئ مهم جدا ومصيري



مايلعبوش ومايضحكوش ومايتشالوش وما يتحضنوش:

طبعا دا مش الطبيعي .. الاسوياء منا ودا المعظم والحمد لله طبعا بيستمع وهو بيلاعب الاطفال ويسمع ضحكتهم بس العجيب ان في بعض الشخصيات ومنها الشخصية العملية علي سبيل المثال (ارجع لفصل الشخصيات الانسانية)


بيعتقد ان حضن الابن او شيله بيطلعه عيل طرى .. ولازم يتعود علي الجفا علشان ينشف.. متصدموش .. دا فعلا موجود

مظهر اول

تلاقي جدة الطفل تقول لام الطفل مش كل ما يعيط تجرى تشيليه .. كده هتعوديه على الشيل وهيطلع عينك ..

مظهر ثاني





ايوه احنا كأهالي مسؤوليتنا مش بس اكل وشرب ولبس ، أحنا مسؤولين عن اعداد كيان .. بني آدم .. سوي ومحبوب وصحي
علشان يخرج للمجتمع يعمل فرق ايجابي ويعيش الحياة الي المفروض يعيشها، مش يكبر بيتعافى ويتعالج من اخطاءنا في
تربيته .. اللي فات كان مجرد امثلة لاخطاءنا ف التربية .. ولسه هنشوف اخطاء تاني خلال الفصل..
مفيش بيت مافيهوش خلافات، مفيش بيت مافيهوش مشاكل، مستحيل!!! لكن في فرق كبير اوي لو انا وجوزي بنتخانق
بس صوتنا مايعلاش قدام ولادنا.. ولا نهين بعض و نقلل من بعض.

لو اتعلمنا وقررنا نفضل مخلين بتنا مكان آمن للولاد يستخبوا فيه من اي حاجه مخوفاهم ويكونوا دايما متطمنين



” اللي فات مجرد امثلة لاسرار واتفاقات بينكم هدفنا الحفاظ علي الحالة النفسية والنمو السليم للولاد.

القرارات ديه بتفرق اوي وقت المشاكل .. زي مثلا لما نتفق أننا نفكر نفسنا ان هدف الخناقه

اننا نعرف أزاى نعدي العقبه ديه في علاقتنا علشان هدفنا اننا نبقى معاً. “

رسالة الى الأهل:

أتعرفوا علي أولادكم منذ نعومه أظافرهـم: أكتشفوهم وأكتشفوا كل شيء يخصهم .. يحسوا اويـفهموا اويوصلهم كل الي نكون عايزين نقولوا أبوه يحسوا بنباضات قلوبكم لما تحتضنوهـم، بيـفهموا ضحكتكم ونظرات الحب الي طالعه من عيونكم. كمان بيحسوا بمدى عمق حبكم او كرهكم ليهم كل انواع مشاعركم بتوصل ليهم.. علشان كده ارجوكم ماتهزروش الهزار الي اتقال لنا كلنا زمان



درة بيضرب هويتهم وبيكون سبب الم ليهم ممكن يخليه هش و يتكسر بسهولة

دول عيال مش فاهمه حاجه"
 • بتقولوا ايه يا جماعه دي حنة لحمه ولا بيحس بحاجه
 أصلًا بلاش بس تكبروا الموضوع"
 • بيتدلخوا .. مش كل ما يعيط تشيلوا هيتعود علي
 الشيل"



هم مش:

• "بحبك يا أعلي حاجه عندي"
 • "أنت هدية ربنا لينا"
 • "أيه الجمال والحلاوه دي"



متقولش



سمعهم
وقولهم

بلاش تستهينوا بمشاعرهم هم بشر صغير الحجم والقدرة ومرهفون المشاعر. هما بس مش فاهمين العالم الخارجي القاسي. أبناو معاهم علاقه من حوار وطبطبه وأهتمام وصبر وحمايه ونظام لحياتهم. أيوة النظام الواضح لحياتهم بيخليهم يحسوا بالأمان لما كل حاجة تكون ليها وقتها، وكل حاجة ليها مكانها .. امتي ياكلوا ويشربوا ويلعبوا ويناموا ويذاكروا ويلعبوا رياضة.



الشبشب المقلوب

الوعي والتعليم عن نفسية الطفل و احتياجاته حاجه مهمه جداً
 • الفطره لوحدها مش كفايه لتربيته طفل .. ولا الموروثات كلها هتنفع في التربيته خالص.
 • الموروثات أصلاً في بعض الاحيان بتكون سبب أساسي لتكوين مُعتقدات غلط فى دماغهم و تكوين شخصيتهم. كلنا كبار و مُتعلمين بس مش ممكن نشوف "الشبشب مقلوب" ومنعدلوش لانه حرام يدي ظهره لربنا!! او قلبت الشبشب بتجيب الفقر .. ونجرى نعدل الشبشب .. لدرجة اننا بقينا نعملها بطريقة لا ارادية.

مش ممكن الكلام دا يا جماعة دي حاجه لا تعقل

هي دي بالظبط المُعتقدات والموروثات الي أنا بتكلم عنها، معتقدات يعني بتتعدد وتتكلم وتترسخ جوانا وبيكون من الصعب جداً أنها تتفك وبنأخذها مذهب ومبدأ وطريق وسلوك في حياتنا بوعي او غير وعي
 أحنا بنربى زي ما أتربيننا .. بس لازم نراجع الي طلعلنا عليه .. لأن في منه الكويس والصح وفي منه السيئ جداً والجرح الي اتعرضنا له من أهالينا الي ممكن يكون حصل دون وعى منهم! وكمان الفطرة مش كفاية في التربية .. لازم نتعلم ونقرى عن تربية الاطفال.



أولادنا يبشوفوا الدنيا من خلالنا:

لما بحب بنتي وأبني زي ما هما، وأقبل لغبطتهم لأنه طفل، واديله مساحته يغلط وأساعده يصحها بالطريق اللي علي اده ويقدر يطبقها، ولما ارد عليه لما ينادي عليا ، أسمع لما يحكي لي قصصه الي احياناً كثير بتكون بسيطة اوي اوي مقارناً بمشاكلي أنا ويومي الصعب الطويل، بيقدر يفهم ويصدق ويدرك أن الشئ العادي أن يكون العالم مُتاح ليه وان العالم لغبطتهم لانهم اطفال .. وانه يقدر يحقق في العالم دا اهدافه ..وعكس تصرفاتي دي ممكن تخليه يحس ان جه مكان مش مرغوب فيه وان الدنيا مش بتحبه ويبدأ يكبر مهزوز ومشوه نفسيا وممكن يفضل ماشي طول الوقت متبني نظرية المؤامرة .. لما بابا وماما يلعبوا معاه ويجروا ويضحكوا ويستخبوا منه ، بيخلي أولادنا يشوفوا الدنيا آمان وبتضحك ليهم، بيكبروا حذرين مش ساذجين بس كمان بتخليهم متزينين مش ماشين مرعوبين



علي جتتي اعمل كدا مع ولادي



فاكره جمل أتقالت قدامي كثير أوي والشخص الي كان بيقولها كان بيأكد علي أنه مستحيل يعمل زي ما باباه عمل معاه في تربيته ..الشخص ده كان متألم من أهله وأكد انه مستحيل يكرر اللي اهله عملوه معاه وقال: **”علي جتتي أعمل كده مع عيالي“** ولما خلف عيال عمل نفس التصرفات بعينها صوره طبق الأصل منها! في جيلنا كان في ظاهرة عند ابهات كثير انه وقت الاعياد ينكد عالاسرة علشان ميحبش لبس العيد .. في رأيي الشخصي ان فترة الثمانينات والتسعينيات في تاريخ مصر كانت اكثر فترة صعبة اقتصاديا علي مصر .. الفترة دي بدأت تنسحب من مصر مظاهر الرقي والشياكة اللي بنشوفها في افلام الابيض واسود البنات لابسين قصير والرجالة لابسين بدل.

والي كان بيعاكس واحدة يقولها بنسوار يا هانم .. وتعداد السكان كان قليل.. انما في فترة الثمانينات والتسعينيات بدأ التعداد يزيد والاخلاق اتغيرت والدنيا بدات كمان تغلي .. وبقينا نشوف في الافلام الناس متشعبطة في الاتوبيس .. والعريس مش معاه خلو الشقة .. وازمة الاسكان .. وبدأنا نشوف الراجل بيشتغل الصبح في شركة وبعد الظهر علي تاكسي .. وبقينا نسمع كثير جملة مستني جواب القوى العاملة.

مش بربر للرجال الي كان بينكد عالييت علشان ميشتريش لبس العيد .. بس احنا ظروفنا احسن منهم .. احنا في عصرنا بقي في التكنولوجيا متاحة للجميع .. يمكن الدنيا دلوقتي اغلي .. بس انا بشوف اننا مرفهين ولو بنسبة ٥% عن اهلينا .. هم كان ليهم ظروفهم الاجتماعية والاقتصادية والتعليمية .. واحنا لينا ظروف تانية .. بلاش نقول لنفسنا احنا اتربينا كدا وطلعنا رجالة ومسؤولين وحلوين وزى الفل .. الدنيا اتغيرت.





كمان خلي بالك من كل حابه انتقدتها في اهلك وقولت علي
جثي اعملها في اولادي زي اللي قال عمري ما هنكدد علي مراتي
علشان مجيبش لبس العيد .. الشخص دا لما اتجوز عمل كدا
مع مراته.



ببساطه مش هنقدر نغير الي اتربيننا عليه أو نعمل عكسه الا اذا أمثلنا معرفه ايه الي
حصل معنا وازاي أثر فينا وأذانا وكمان محتاجين ادوات مختلفه فى الترييه الاول.. تخيلنا
نغير افكارنا بتجديد اذهاننا فانقدر نغير صورتنا عن نفسنا وبالتالي نرفض الي حصل معنا
ونتعلم وسائل أصح علشان نطبقها مع اولادنا في الترييه.
بس في الحقيقه لازم اخف من الي حصل فيا من تربية اهلى الاول الي كانت فيها حاجات
غلط علشان أقدر أقدم لأولادي حابه مُختلفه.

وهنا بيجي الأختيار لو عايز نغير سلوكياتك الخاطئه مع اولادك أو تلاقي طرق لحل مشاكلك معاهم لازم تختار
قرار صعب وهو انك تقبل تتعلم طرق ثانيه وبالتالي تقبل تغيير افكارك عن طريق التجديد الي هتعمله في
ذهنك بالمعلومات الاصح الي هتقراها او تسمع عنها وبالتالي تعلم وتدرّب نفسك بصبر على الي هتتعلمه.
لكن مش بس انت محتاج لمعلومات لأن المعرفه لوحدها مش بتغير لكن المعرفه بتخليني اشوف ولما
بشوف وأفتح وأقبل اني أشوف نفسي علي حقيقتها الدنيا بتتغير وبختار بأرادته اني اكون مُختلف علشان دي
هتكون البدايه الحقيقه.

الاحتياجات الاساسية للاطفال

مهم نتعلم ان الاطفال عندهم احتياجات أساسيه لازم انها تسدد .. او على الأقل بنسب كويسة ..
والاحتياجات حسب هرم أبرام ماسلو هي:





١ - الحاجات الفسيولوجية

يعني الطفل محتاج (الطعام والشراب واللبس والراحة) ودا الاحتياج الاول علشان الانسان يفضل عايش مايموتش.



٢ - حاجات الأمان (المادية والمعنوية والصحية)

من الناحية المعنوية في شئ مهم اوى وهو ازاي بأدب اولادي بشكل صحى يعلمه من أخطائه وما يزرعش فيهم الخوف ويفقدهم الأمان. فأمان الطفل فى حضن اهله وثباتهم فى حبه مهما عمل وده اسمه الحب الغير مشروط. طرق التأديب ليها أشكال مختلفه ولكن اهم شئ انه الطفل مايتحرمش من والديه بالخصام او الضرب والأهانه لأن دي طرق عنيفه تفقد الطفل امانه النفسى وتهز ثقته فى والديه وفي نفسه .



٣- الحاجات الاجتماعية

الحب والتفاعل مع الآخرين و ده بيحصل من خلال خمس لغات للتعبير عن الحب فكل طفل له لغتان اساسيتين يستقبل بيهم الحب ويعبر بيهم عن حبه ولازم الاهل يكونوا عارفين لغه كل طفل من أطفالهم لانها بتختلف من طفل لأخر. مهم يكتشفوا لغة حب طفلهم علشان يعرفوا ازاي يعبرولوا عن حبهم ليه.



اللغات الخمسة للتعبير عن مشاعر الحب هما:

الكلام المشجع



أعمال خدميه




الهدايا



التلامس (الطيبه)



الوقت القيم



أنا كأب أو أم ممكن لغتي تكون التلامس بس ابني ممكن اهم لغه ليه هي الوقت القيم. فانا لما بتعلم لغات الحب الخمسة يعرف نفسي الأول وكمان بفهم لغات أولادي علشان اقدر اضمن اني اوصل ليهم حبي باللغه الي يفهموها.

٤- الأحتياج للتقدير

الاحترام وتقدير الذات .. لازم تحترم الطفل زيه زي الكبير .. أحترامه شئ مهم زي احترام الكبير .. واني ما احاولش اقلل منه أو من كلامه او ردوده. لأنه لازم يحس انه متقدر كانسان .. لانه دا بيعلمه يقدر نفسه ويحبها وكمان بيتعلم احترام الأخرين وتقديرهم .. لام يكون حاسس انه كيان وانه له رأى و ان صوته مسموع .. واننا لازم نقعد ونتعب علشان نقنعه بحاجه عكس افكاره مش نجبره.

٥- الحاجة لتحقيق الذات

مهم اوي اديله مساحه يحقق نفسه. مساحه بعيد فيها عني .. مساحه كويسه فيها يدرك هو مين وينجز ويحقق ذاته. ومهم اوي اعلمه مبدأ هختم بيه الفصل ده. مبدأ قيم جداً يعرفه وهو بينجز في حياته. القصة الي جايه هتشرحه.



مش هنسي القصة ديه ابدأ:
ولد عنده ٦ سنين جاي منهار ان صاحبه في المدرسه ضربه علشان ياخذ منه اللعبة الي كان بيلعب بيها..
بعد ما تم التدخل في الموقف واتسأل بتعيط ليه؟
رد وقال: "ضربني علشان يأخذ اللعبة !! الانسان اهم ولا اللعبة؟"
الانسان أهم ولا اللعبة؟ ده المبدأ الي اتربي عليه الولد ده. أتربي علي ان الانسان اكيد اهم من اللعبة. وانت
السؤال ليك انهارده أيه المبدأ الي بتربي أبنيك وبنيتك عليه؟ مين أهم؟ هما ولا أنت؟ الانسان الاخر مهم؟؟
ولا مش مهم يدوسوا علي الأنسان ويأخذوا الي هما عايزينه!؟



المُلخص:

- أنا المسؤول عن تربية اطفالي تربيته سوية وسليمة
- أحتاج ان أقول لنفسي: "لن ادع ابني أن يكون اب لي ولن ادع بنتي تكون أم لي"
- مفيش بيت مافيهوش مشاكل لكن كتر الصراعات والنزاعات في المنزل تخلق من الطفل شخص مهزوز وضعيف وغير فعال لنفسه وفي المجتمع.
- دورنا كأهالي ليس محصور فقط في تلبية احتياجات اطفالنا للأكل والشرب ولكن أدراكي كل يوم بأهمية تأهيل نفسي أن أكون أب وأم قادرين ومستعدين لتنشئة جيل مميز
- احتاج ان اطلب المساعدة لأتعلم كيف اربي نفسي اولاً ثم ابنائي
- الوعي المستمر بنفسي يجعلني في تواصل مستمر بالنفس مما يؤدي الي أدراك مشاكلي الشخصي للتعامل معها والعمل علي تصليحها
- التعلم الدقيق عن الاحتياجات الأساسية للأطفال يجعلني شخص قادر علي تطبيق طرق تربيته سليمة وبناءه
- أدراكي للمبادئ البسيطة الب بواصلها لاولادي وانا بريهم



تم إصدار هذا الكتيب تحت مظلة برنامج «القضاء على العنف ضد النساء والفتيات وإتاحة خدمات أساسية عالية الجودة» الذي أطلقته هيئة الأمم المتحدة للمرأة في مصر، عام ٢٠١٥، بالشراكة مع المجلس القومي للمرأة. وهو واحد من البرامج التأسيسية لهيئة الأمم المتحدة للمرأة في إطار المبادرة العالمية حول «منع العنف ضد النساء والفتيات والحصول على الخدمات الأساسية لإنهائه». ويساهم البرنامج في تحقيق الهدف الخامس من أهداف التنمية المستدامة: «تحقيق المساواة بين الجنسين وتمكين جميع النساء والفتيات»، ولا سيما الغاية ٥،٢ التي تسعى إلى «القضاء على جميع أشكال العنف ضد النساء والفتيات في المجالين العام والخاص، بما في ذلك الاتجار بالبشر والاستغلال الجنسي». ويتم تنفيذ أنشطة هذا البرنامج بدعم من الوكالة الأمريكية للتنمية الدولية.



المجلس القومي للمرأة
THE NATIONAL COUNCIL FOR WOMEN

مراجعة
أ. دينا حسين

عضو المجلس القومي للمرأة
رئيسة لجنة الشباب بالمجلس القومي للمرأة

اعداد
أ. سارة عزيز

مديرة ومؤسسة Safe Kids Egypt

info@ncw.gov.eg ✉

http://ncw.gov.eg 🌐

11 شارع عبد الرزاق السنهوري- متفرع من مكرم عبيد- مدينة نصر.
القاهرة- مصر

02 23490060 📞

01007525600 📞

للتواصل مع مكتب شكاوي المرأة: 15115

#سر_قوتك
معاكزة



اتصل على
15115
للحصول على الدعم القانوني النفسي الاجتماعي

مكتب شكاوي المرأة
احنا معاكي